

PRICE, THOMAS (MALDWYN) (1860 - 1933; cyfansoddwr, organydd ac athro cerddoriaeth

Enw: Thomas (Maldwyn) Price
Dyddiad geni: 1860
Dyddiad marw: 1933
Priod: Elizabeth Price (née Evans)
Plentyn: Arthur Iago Price
Plentyn: Richard Maldwyn Price
Rhiant: Jane Price (née Howell)
Rhiant: Thomas Price
Rhyw: Gwryw
Galwedigaeth: cyfansoddwr, organydd ac athro cerddoriaeth
Maes gweithgaredd: Addysg; Cerddoriaeth; Perfformio
Awdur: Enid Pierce Roberts

Ganwyd ef yn Nhalerddig, Llanbryn-mair, 19 Mawrth 1860, yn fab i Thomas Price, gof a weithiai ar y pryd ar wneud y ffordd haearn, dan [David Davies](#) (1818 - 1890 a'i wraig Jane (Howell)). Ni fedyddiwyd mohono'n 'Maldwyn'; mabwysiadu'r enw'n ddiweddarach a wnaeth. Yr oedd gan ei dad lais bâs cyfoethog ac yr oedd yn enwog fel arweinydd côr. Yr oedd chwaer i Thomas 'Jenny Maldwyn', yn enwog fel contralto. Addysgwyd Thomas (Maldwyn) yng Ngholeg y Brifysgol, Aberystwyth, dan [Joseph Parry](#), ac yn ddiweddarach yn y Royal Academy of Music, Llundain. Oddeutu 1885 daeth i'r Trallwng, Sir Drefaldwyn, yn organydd a chôr-feistr Eglwys Fair, ac yno y bu weddill ei oes. Bu farw 9 Gorffennaf 1933; claddwyd ef ym mynwent Eglwys Fair. Cyfansoddodd lawer o gerddoriaeth eglwysig, salm-donau, emyn-donau ac anthemau. Ei weithiau mwyaf adnabyddus yw'r ddau ddarn i gorau meibion 'Croesi'r Anial' a 'Y Pysgotwyr' a'r emyn-dôn 'St. Elizabeth'. Yn 1889 priododd ag Elizabeth (bu farw 13 Rhagfyr 1933, yn 67 oed), merch Richard a Jane Evans, Upper Boar, Llanfyllin. Ganwyd iddynt ddau fab, Richard Maldwyn Price (1890 - 1952), y cyntaf i ennill gradd Doethur mewn cerddoriaeth ym Mhrifysgol Cymru, ac Arthur Iago Price (ganwyd 1897).

Awdur

Dr Enid Pierce Roberts

Ffynonellau

Gwybodaeth a gafwyd gan ei nai, Capt. W. M. Evans, Y Trallwng

Dolenni Ychwanegol

VIAF: [34169973](#)

Wikidata: [Q20746845](#)

Dyddiad cyhoeddi: 1970

Hawlfraint Erthygl: <http://rightsstatements.org/page/InC/1.0/>

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

